



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



**Yahya asüba ajanga'Axis of Resistance'
menokdangtsü: Khamenei**

VOL. XXII ISSUE NO. 11 (ADOK 11) DIMAPUR AMUNGNÜ (SUNDAY)

MONGPUTENI (OCTOBER) 20, 2024 ₹ 5.00

Assam Rifles-i Konyak nunger 2 aibelena apu

Dimapur, October 19, 2024 (TYO): 43 Assam Rifles-i Dimapur nung September 27, 2024 nü Konyak nunger ana aibelena apu ta Konyak Union Dimapur (KUD)-i metedaktsüogo.

Pukha nunger Tahngao ya KUD sanen luden züngsem ka lir aser ano Neitong nunger Nyemphoa ya Neitong Village Students' Union President lir ta KUD-isa ash.

43 Assam Rifles-i tena ya Dimapur railway station nung tesem balala nung apu aser NSCN züngsemtem ta tai tongloka lir ta KUD-isa ash.

43 Assam Rifles-i tenaprong ya civilian ta meteta liaka NSCN züngsemtem ta ser apuba ya tena dang masü saka tena inyakba teloktem tenüng menüksüba inyakim ka lir ta KUD-isa metedaktsüogo.

PM Modi-i Rs 6,000 crore alang mapatong sayatsü

New Delhi, October 19, 2024

(Agencies): Prime Minister Narendra Modi-i Deobarnü par parliamentary constituency Varanasi semdangtsü aser idangji mapatong kar atema lung azüngtsü aser kar sayatsü. Mapatong 23 ya Rs 6,611.18 crore alang lir.

Varanasi nung PM Modi-i Rs 90 crore endoka yangluba RJ Sankara Eye Hospital lapoktsütsü. Iba sentong nung Shankaracharya Swami Vijayendra Saraswati adentsü.

Prime Minister-isa Varanasi Airport ulushitsü aser terminal building tasen ka yanglutsü atema lung azüngtsü. Paisa health, education, sports, religion, tourism, aser housing dak sendakba mapatong aika

Friends of the hills people' ta ajartemi iba ama tashiyim aser tim masüba inyakba ajanga nübertemi ozüng amertem dak temulung malem adokdaktsür aser tenem nung alirtem tetsübu tia kati idaktsür ta parnokisa ash.

Ozüng amertemi linük nung tai maket sensotem dak kanga kümdanga inyaktsüla, pei lemzükba mapa nendaka inyaktsüla aser maitsü jangjaba sülen ang nisungtem aputsü mepishir ta Konyak Union Dimapur (KUD)-i metedaktsü.

Union, Village Council aser sendaka aliba teloktemi kulikakettem agütsüba nung ajemdaker ozüng benshirtemi Tahngao Konyak aser Nyemphoa Konyak na tatemzükba kecha melii chioktsü mepishir kechiyong tena ya 43 AR-i aibelena pur tai tongloksüba lir ta KUD-isa metedaktsüogo.

lapoktsütsü.

PM Modi-isa Shri Kashi Vishwanath Temple Trust ajanga free food programme tasen ka tenzükba osang sangoktsütsü.

Prime Minister Modi-i asüng anüngdang 1:00 ako meta Varanasi atongtsü aser aonung 6:00 ako nung Delhi-i apusoa aotsü.

Babatpur International Airport atongba sülen PM Modi-i Shankara Eye Hospital lapoktsütsü aser idak nung jagi Siga Sports Complex-i orr Rs 380.13 crore endoka mapatong kar inyaktsü lung azüngtsü.

Eye hospital aser stadium dak alia PM Modi-i Rs 2,874.17 crore endoka yangluba mapatong 14 lapoktsütsü.

nung section 6(1) kübok tetuyuba kar agütsü.

Kithagha village meketa kilometer 1 telongtet nung ak mebelenshitsü aser ak/shi mayoktsü ta Tseminyu DC-i metedaktsüogo.

DC Rohit Singh-isa infected zone tema kilometer 9 surveillance zone nung ketdangsürtemi jungjunga reprangtsü aser infected zone nung shiruru tasütem timi endoktsü tetuyuba agütsüogo.

21,2024 nü mass social work alitsü ta shia liasü saka tsüngsang majungba ajanga October 25, 2024 anepdang 7:00 nungi tenzüktsü melenshiba metedaktsür ta Home Department-i tanü sangdong ka nung ashi.

Tseminyu DC-i ASF atema metedaktsür

Dimapur, October 19, 2024

(TYO): Tseminyu District kübok Kithagha yimtsüng nung African Swine Fever (AFS) adoka aliba atema Tseminyu Deputy Commissioner Rohit Singh, IAS-i tetuyuba kar agütsüogo.

Department of Animal Husbandry and Veterinary Services ajanga AFS aliba osang sangoktsüba sülen Tseminyu DC-i The Production and Control of Infection and Contagious Diseases in Animals Act, 2009

nung section 6(1) kübok tetuyuba kar agütsü.

Kithagha village meketa kilometer 1 telongtet nung ak mebelenshitsü aser ak/shi mayoktsü ta Tseminyu DC-i metedaktsüogo.

DC Rohit Singh-isa infected zone tema kilometer 9 surveillance zone nung ketdangsürtemi jungjunga reprangtsü aser infected zone nung shiruru tasütem timi endoktsü tetuyuba agütsüogo.

Home Department-i anogo melenshiba metedaktsür

Dimapur, October 19, 2024

(TYO): Nagaland Home Department-i October 18, 2024 nü lokti nübodoka mapa inyaktsü sangdong agütsüba anogo melenshiogo.

Taoba sangdong nung October

25 buba Hornbill Festival jazüka Autumn Festival amonger



Nagaland House, New Delhi nung 3 buba Autumn Festival tenzükang Tourism and Higher Education Minister Temjen Imna Along, Director General, Ministry of Tourism, Government of India Mugdha Sinha IAS aser Ambassador of Peru in India Javier Manuel Paulinich Velarde nunger agiba noksa ka angur.

Dimapur, October 19, 2024

(TYO): October 18, 2024 nü Nagaland House, New Delhi nung 3 buba Autumn Festival tenzükogo. Iba benjung ya Hornbill Festival jazükba sentong ka ama lir.

Tourism and Higher Education Minister Temjen Imna Along-i Autumn Festival atema chief host ama shilem agi.

Iba sentong nung tongti tesemdangerji Union Minister of State, Consumer Affairs, Food and Public Distribution, Social Justice and Empowerment, B. L. Verma liasü aser Ambassador of Peru in India Javier Manuel

Paulinich Velarde-i tetushi süa jaoker ka ama shilem agi. Sentong nungsa Director General, Ministry of Tourism, Government of India Mugdha Sinha IAS aden.

Autumn Festival ya Hornbill Festival tenzüktsü anogozüng tenzükba benjung ka lir aser Naga kin 17 longemer Hornbill nung shilem agütsü atema renemtsüla, ta Minister Imna Along-i ash.

"December 1-10, 2024 tashi Kisama nung 25 buba Hornbill Festival amongtsü anungji iba benjungmong nung shilem agütsü ayongzüker" ta pai ash.

"Hornbill Festival ya benjung

ka dang masü saka tesentaktep yangluba aser temulung lemtep adokba mapang ka lir. Ministry of Tourism, Government of India aser Country Partner, Peru-i Hornbill Festival den sendaktepba atema pelar" ta Imna Along-isa ash.

"Hornbill Festival takok ngua mongyonga aruba atema Nagaland sorkar aser nübertem nem tenüngsang agütsür. Naga nungeri kanga merangba ajanga küm 25 tashi iba benjung amongtsüba lir aser tanübo international bands-i shilem agir aser linük balalai iba benjung nung Nagaland den partner kümünür" ta Director General, Ministry of Tourism, Mugdha Sinha-i ash.

Naga nunger chiyungtsü, kenten aser sübosolemtsütem tangar den lemsatepba atema state sorkar aser nübertem dang pelar ta lai ash.

Iba sentong nung Commissioner & Secretary, Tourism Dr. G. Hukuga Sema, IRS-i tesentepertem pelaa agizük.

Benjung lapokba sentong nung Ao Naga Choir, Ao students aser DGP Band temi shilem agütsü. Iba benjung ya October 20, 2024 tashi amongtsü.

Autumn Festival ya Tourism Department, Government of Nagaland-i Office of the Resident Commissioner, Nagaland House, New Delhi den yaritepa ayongzüker.

NFHRC-i Chief Engineer (R&B) shidi magizüker

Dimapur, October 19, 2024

(TYO): October 16, 2024 nü Chief Engineer (Roads and Bridges) ajanga züluba shidi magizüker ta Nagaland Foot Hills Road Coordination Committee (NFHRC)-i metedaktsüogo.

Iba shidi nung department-i NFHRC nem mapa agütsütsü aser foothills road project inyaktsü atema tripartite agreement magitetsü ta shia lir.

NFHRC tentetba sülen nungi onoki iba otsütsütsü Naga mapatong kümzüka ayutsü atema tebilemtsü khuret jenti bona arur aser iba mapatong nung politics maitdaktsütsü ta lung azüngä lir ta kettangpurtemi ash.

2013 küm PWD, R&B-i NFHRC nem contractors shimtsü tashi agütsü aser iba nung ajemdaker committee-i timtem aika agia mapa inyaka aruogo. Ano, September 22, 2022 nunga Nagaland Legislative Assembly-i Foothills Road ya North Eastern Council (NEC) funding ajanga yanglutsü ta bangjemtepa liasü.

Ajisüaka iba mapa meinyakba agi aiben mepishia aruogo aser

tatem nung committee-i Nagaland Governor den ajurutepa tebilemtsü lemsatep aser iba ajanga December 17, 2023 nü committee-i Union Minister of DONER den ajurutep. Kasa mapang iba mapatong ya SASCI kübok senotsü lemzüktsü aser May 8, 2024 nü committee-i onük 7 aliba memorandum ka bangdak department nem agüja liasü ta kettangpurtemi ash.

Iba memorandum nung mapa shitak inyaktsü aser Department, Committee aser contractors tsüngda tripartite agreement ka agütsü shia liasü. Young Qualified Naga Entrepreneurs (Contractors) ajungketsü tebilemba nung work order ka dang agütsütsü aser iba jia 10 - 15 Kms atema dang ta committee-i shia liasü.

Mapa inyaktsü mongpu tonga aruba agi committee-i Nagaland Contractors and Suppliers Union (NCSU) den 2014 küm nangzüktepa aliba akangshitep aser October 15, 2024 nü bangdak department dang FHR 2 lane construction atema senden

ka ayontsü mepishir. Ajisüaka tasüngji Chief Engineer R&B nungi shidi ka aruba nung mapa lemsaba nung NFHRC medendaktsütsü aser NFHRC den tripartite agreement magitetsü ta shia liasü.

Iba atema NFHRC-i Dimapur nung amenoka aliba telok 12-Ao Senso Telongjem Dimapur, Chang Union, Phom Union, Western Yimkhuing Hoho, Western Sumi Hoho, Khiamniungan Union, Western Sangtam People's Organisation, Lotha Hoho, Zeliang People's Organisation, Kuku Inpi, Rengma People's Organisation aser Konyak Union den senden ka amendang May 8, 2024 nü NFHRC-i onük 7 adenba memorandum pusemtsü bangjemtepo.

NFHRC-i tenteter küm 11 inyaka arur October 16, 2024 nü shidi züluba jangjashitsü atema Commissioner & Secretary NPWD, Engineer-in-Chief (NPWD) aser Chief Engineer (R&B) nunger dena senden ka amentsü atema kin 12 den senden amendang lemtetogo ta kettangpurtemi ash.

Dimapur police-i temesepba mozü shibelenba aser gari auyar telok ka putet



Dimapur, Mongputeni/ October 19 (TYO): Dimapur Police-i, Assam, Manipur aser West Bengal nungi temesepba mozü shibelenba aser gari auyar nisung ti apuba sülen state balala nung amendaker ozüng alema inyaksangshiba telok ka putetogo aser parnok ket nungi gari ana ngutetogo.

Nisung ka samaba indang

East Police Station nung FIR ka benokba bushisüngdanga mapang Nagaland, Assam, Manipur aser West Bengal nung inyaksangshiba aliba iba telok indang jangja aküm.

Iba telok yagi clients ama state ka nungi ka tsüngda senzüba commercial garitem hire asür. Par telok nungi züngsemtemi gari anir den

tembar ayimtsü, temesepba mozü inoker chiyongtsü agütsütsü aser gari anishir süjia or aliba mapang gari auyar ajener.

Parnok rongnung tongtibaji West Bengal nungi Shymalendu Roy ta jangjaogo, shibai tasa asar aser pa sülen anidakertemi tasatem benoka inyaksangshir.

Technical surveillance ajanga bendenba digital kuli tem dak ajemdaker iba telok nungi züngsem ana Manipur nungi, züngsem pezü Assam nungi aser züngsem ana Dimapur nungi pua liasü.

East PS team ya ACP East Imkongsangba Jamir, NPS tawabangba kübok Investigating Officer (I/O)

ASI. Ikato Sema-i anir inyaksangshia liasü.

Ken o dak sendakba nung commercial gari anishirtem aser kiburtem dang iba amala inyakyim nungi jenboa alitsü atema kümküma atatsü aser gari anishir mesüra gari samara takaratiba nung police nem osang agütsütsü metedaktsüogo.

NH-02 nung long poksatsü atema Mkg DC-i temelaba agütsüogo

Dimapur, Mongputeni/ October 19 (TYO): Mokokchung Deputy Commissioner Thsuvisie Phojibi, JKM Infra Works LLP, Guwahati, Assam nem D.E.F Police Church nungi Yisemyong tsüngda two lane lenmang atsülangshitsü atema longtem poksatsü asoshi temelaba agütsüogo.

Iba inyakyim ya Angetyong Tzu ayong temeket nung Deobar; October 20 nü nikongtsütsü 3 ako nungi aonung 10 ako tashi inyaktsü.

Inyakyim tesashi kar sülen anidaktsü asoshi tetuyuba agütsü iba temelaba agütsüogo.

Iba inyakyim benoka inyakba mapang contractor temi iba lenmang amshirtem taküm aser parnok indang osettsütetem kümzüka toktsütsüla. Kasa mapang nung company-i explosives Act/Rule, 2008 kübok temzung ozüng ajak sülen tashi aña anidaktsüla. Maneni iba maparen benoka inyakba mapang nisung taküm aser osettsüset kar danga takoksa ajurura JKM Infra Works LLP

khuret asütsü. Iba temelaba ya October 20, 2024 nü atema dang asütsü, ta kasa sangdong ajanga metedaktsü.

Kasa mapang nung Deputy Commissioner Thsuvisie Phojibi, Mokokchung District kübok jila aser yimtsüngtem nung arem shiruru aser ozü sangnu makhatsü asoshi tenokdangba agütsüba metedaktsüogo.

Tetuyuba nung ashiba agi, Nagaland sorkari 1981 küm December 18 nü nungi tenzüka wildlife protection Act, 1972 agizükogo, aser iba kübok Nagaland nung arem shiruru/ozü makhatsü tenokdangba agüja lir.

Iba Act kübok koya amala shiruru tapu kar dang akhatsü asoshi temelaba agüja lir mesüra Act nung shisema aliba provisions kar dak ajemdaker temelaba agütsüba mapang dang shi khatettsü.

Iba dak alaka mapang mesüra shiruru tapu balala dak sendakba nung kecha taitok mali.

Maneni Amur Falcons ya Wildlife Protection Act 1972 kübok kümzüka yua lir. Anungji metsütsü mesüra achitsü atema

Amur Falcons akhaba, apuba, tepsetba mesüra ayokba ya ozüng alema aser küm asem tashi tepuokdak ayutsü akok mesüra senchi sen 25,000 achitsü mesüra Wildlife Protection Act 1972 Section 9 & 51 kübok temerenshi anaprongla yagi merenshitsu akok.

Anungji iba dak ajemdaker kari danga iba ozü akhaba, apuba, tepsetba mesüra ayokba metetra parnok anema jenjang tapet agitsü.

Sorkar tetuyuba sülen anidaka aser district nung aremshirurutem wazüka ayutsü nükjidong nung Mokokchung District kübok yimtsüng aser jila ajak dang DC-i iba tenokdangba agütsü aliba ya shitak benoka i n y a k s a n g s h i t s ü metedaktsüogo.

Nisung mesüra lokti kari danga temalen shisema aliba tetuyuba sülen manidaki inyaksangshiba metetra Wildlife Protection Act, 1972 kübok section tapet dak ajemdaker merenshitsu, ta kasa sangdong ajanga metedaktsüogo.

Dimapur aser Mkg DC-i merekmeju sentong indang metedaktsü

Dimapur, Mongputeni/ October 19 (TYO): Dimapur Deputy Commissioner Dr. Tinojongshi Chang, NCS-i sangdong ka ajanga October 21 nü lokti nübutoka merekmeju sentong ka ayongzüka agitsü ta metedaktsüogo.

Chang-isa, ken o dak sendaka aliba department, lokti tentet balala aser nüburtem dang state ajunga nung merekmeju sentong ayongzüka agiba nung mulungsoa shilem agitsü mepeshia metedaktsüogo. Merekmeju sentong ya anepdang 6:00 ako nung tenzüksü.

Kasa mapang nung Mokokchung Deputy

Commissioner-ia October 18 nü sangdong ka ajanga Mokokchung Municipal kübok kiyong balala ketdangsürtem dang October 21 nü 7 ako nungi tenzüka merekmeju sentong ayongzüka agitsü tetuyuba agütsüogo. Iba merekmejung sentong ya 25buba Hornbill Festival 2024 nüngdem nung ayongzüka agitsü lir.

Iba dak sendakba nung DC-isa kiyong balala ketdangsürtem dang pei kiyong nung nüburtem ayongdena iba merekmejung sentong nung shilem agitsü ayongzüka den administration nem agütsütsü asoshi noksa tajung tangoka agütsütsü mepeshia metedaktsüogo.

AR-i prangbong aser hadirtem sayaba sentong ayongzüka agi



Dimapur, Mongputeni/ October 19 (TYO): Assam Rifles-i October 17 aser 18 nü OF Sainik School Punglwa, Nagaland nung prangbong aser hadir balala sayaba sentong ka ayongzüka agiogo.

Hopta tepeyong ayongzüka agiba camp nung shilem ka ama iba sentong ka ayongzüka agiogo, koba lanurtem nem prangbong aser hadir balala dak sendakba nung shisatsü tali agütsütsü aser parnok skill tajungba kümduktsütsü nükjidong nung ayongzüka liasü.

Sentong ayongzüka agiba mapang prangbong aser hadir tapu balala aika sayuogo aser iba ajanga kaketshirtem nem military arsenal indang tali metedaktsüogo.

Assam Rifles nungi weapon training instructor temawabangba kübok


kaketshirtem item prangbong aser hadir balala amshitsü maongka ngua liasü. Lanurtem nem armed forces indang mapa agi inyaka sayua parnok ajungmesotsü aser parnok nem linük tali meima kümduktsütsü nükjidong nung iba sentong ayongzüka agiogo.

Sentong nung kaketshirtem kanga jangrabangra shilem agiogo aser tangazükba tajung agütsüba atema kanga pelaba lemsatepa liasü.

Iba inyakyim ajanga educational program balala ajanga tarutsü lenirtem anitetsü aser sentong balala nung lokti anisema shilem agidaktsütsü Assam Rifles' bedanga agütsür aliba sayur. Maneni iba sentong ajanga lanurtem den inyaktsü atema Assam Rifles bendanga agütsür aliba tatishitsü tejangjaba sayur.



Tribal Old Age Home cum Day Care Centre tenzüker küm 10 ajungba anogomung October 19 nü "A Decade of Gratitude, Celebrating Life's Journey" omen nung amendaker mungogo. Iba sentong nung Grace Place Ministry Director Bendang Longkumer tongti o jembir liasü. Sentong nung tientet rogotem aser caregivers temi ken tena liasü. Maneni TOAHDC Director Imlitongzuk Amri-i taoba kümtem tajangshibatem aser tarutsü nüklatem indang lemsatepa liasü. Iba sentong ya S. Asenla Jamir-i temaotsü meshia sarasademer tembanga liasü.



October 19, 2024 nü Srinagar nung Jammu & Kashmir Lt. Governor Manoj Sinha-i (abelen) National Conference (NC) MLA, Mubarak Gul nem Assembly nung Pro-Tem Speaker tenangzükba agidaktsüdang tangokba noksa nung angur.

Sikh organization-i India aser Canada tsüngda ken o jembidaktsüner

New Delhi, Mongputeni/ October 19 (Agencies): Tang India aser Canada na tsüngda tesendaktep ano tamajungba akümbe ya ajanga India nung dang masü saka Canada, US aser alima tesem balala nung Sikh nunger jenjang raksatsü, ta North American Punjabi Association (NAPA) executive director, Satnam Singh Chahal-i ashi.

"India aser Canada ana tsüngda tesendaktep raksaba ya ajanga bendanglen alir Sikh nunger temi timtem jenti ajurutsü, ta onoki tebilemtsü akar," ta pai ashi.

Chalal ya Punjab nung soa intetba sülen 1997 küm par kibong den külemi US-i oa ali. India aser Canada na tsüngda tsükchitep tamajungba akümbe ya ajanga Canada aser US nung Sikh nunger temi kanga takoksa angur, ta pai ashi.

"Alima tesem balala nung onoki tenla mapa tajung inyakba aser nüburtem tenzükba ya alimai junga meteta lir. Ajisüaka tang tensa ya ajanga onok indang gurdwaras kar nungbo timtem adoker. Onok indang yimsü tamendakdakji 'sewa' lir aser onok ya nüburtem tenzükba yimsü telok ka lir," ta paisa metedaktsü.

Ajisüaka tang India aser Canada sorkar na tsüngda mangattep adok, aser iba ya ajanga anüolen linüktem nung

Hardeep Singh Nijjar tepsetba sülen India aser Canada na tsüngda tai tongloksütepba ajanga bendanglen alir Sikh nunger temi tsüngda-a telesma adoker, ta pai ashi.

"Sikh nunger karibo Canada sorkari inyakbaji meimchir temeden atema nokdakba lir ta bilemer aser onok rongnung karibo iba ya India anema inyakba ama bilemer. Iba ama tangatetta balala ajanga kibongtem aser loktiliba nung telesma adokdaktsü," ta pai ashi.

Paisa, America aser Canada nung alir Sikh nunger temi item ama tayongzükba balala koktetsü atema US, Canada aser India sorkartem teyari nüngdaker, aser Canada nung Sikh nunger karibo pei taküm atema tsübu bilemer, ta ashi.

"NAPA-i India aser Canada sorkar naprongla dang ajak kümzüktsü, talisa minorities kümzüktsü atema inyaktsü onoki ayongzüker," ta paisa shisem.

Anepdang IED apokba lendong nungji ITBP sepaitem aika yiruba sülen arem nungjagi parnok hospital-i anir ao, saka anabo mekümzükte asü.

Iba tatalokba sülen security sepaitemi asentenshir telungpurtem mita odar.

Chhattisgarh kübok Narayanpur district nung ITBP sepai ana pokset

New Delhi, October 19 (Agencies): Honibarnü Chhattisgarh kübok Narayanpur district nung Maoists telungpurtem mita aoba sülen meyipa aoba mapang nung Narayanpur district kübok Mohandi yimdak iba lendong atalok, ta Inspector General of Police (IG) Bastar, P Sundarraj-i metedaktsü.



October 19, 2024 nü Ranchi nung Jharkhand Chief Minister Hemant Soren-i CPI (ML) lenirtem-Vinod Singh, Arup Chatterjee aser Bablu Mahato nunger den senden amendang tangokba

Vijaya Kishore Rahatkar NCW Chairperson shimogo

New Delhi, Mongputeni/ October 19 (Agencies): Honibarnü Centre sorkari National Commission for Women (NCW) chairperson menden atema Vijaya Kishore Rahatkar shimogo; lai Rekha Sharma melenzüker.

Honibarnü sorkari sangdong ka ajanga, National Commission for Women Act, 1990 kübok Arrla 3 nung ajemdaker la küm asem atema shimmer mesüra la arrshi küm 65 majung tashi iba menden atema shimmer, ta metedaktsü.

Iba dak alia Archana Majumdar-a küm asem atema NCW nung züngsem shimogo, ta Ministry of Women & Child Development-i metedaktsü.

Vijaya Kishore Rahatkar ya tang Bhartiya Janata Party nung National Secretary aser BJP Rajasthan unit nunga Co-Incharge lir. La ya taoba mapang Maharashtra Women's

Commission nunga chairperson inyaka liasü.

Rahatkar-i Protection of Children from Sexual Offences (POCSO), anti-triple talaq cells aser anti-human trafficking units nunga inyaka aruogo. Laisa digital literacy programs tenzüksü aser tetsürtem indang tebilemtsü onük balala atema "Saad" ta ser osangkaket ka tenzük.

Tetsürtem nem tashi agütsüba dak sendakba nung la nem National Law Award aser Savitribai Phule Award agütsüogo. La 2007 küm nungi 2010 küm tashi Chatrapati Sambhajinagar nung mayor inyaka liasü.

Laisa healthcare aser infrastructure dak sendakba terenlok project aika inyakogo.

La physics nung bachelor degree angu aser University of Pune nung master's degree angu.



October 19, 2024 nü New Delhi nung AAP tongti lenir, Arvind Kejriwal-i taoba mapang Delhi nung Minister, Satyendar Jain (ajichi) ajurudang tangokba noksa nung angur. Court kati Jain bail nung chiokogo.

Ghonda 15 tsüngda Air India group aser IndiGo tayimtsü 8 amokmeren

New Delhi, October 19 (Agencies): Tesüiba anogo ishika India nung airlines balala amaktsü ta amokmerena arudar; ajioda Hokolbar aonung nungi tenzüka ghonda 15 tsüngda kija nunga Air India Group tayimtsü asem aser IndiGo tayimtsü pongu amokmerenogo.

Delhi aser London na tsüngda senzüba Vistara indang tayimtsü-a Frankfurt tsütsüleni ao aser tayimtsüji junga mita reprangba sülen ang London-i ao. Newark nungi Mumbai tashi senzüba Air India tayimtsü-a amokmerenba sülen ghonda asem tashi mita reprangba ajanga kanga menor ang tayimtsü apusoia liasü.

AI Express Dubai-Jaipur tayimtsü Jaipur tanga aoba sülen tayimtsüji kanga tezülen anenba sülen jungjunga mita reprangba liasü. Vistara indang Udaipur-Mumbai tayimtsü-a amokmerena liasü.

Vistara otongdar kati, "Delhi nungi London tashi senzüba UK17 tayimtsü October 18 nü social media ajanga amokmerena liasü. Inyakyim kübok tim ketdangser ajak nem iba osangji metedaktsü aser pilot

temi tayimtsüji Frankfurt-i ang anir ao. Frankfurt Airport nung tayimtsü anenba sülen security agency temi tayimtsüji jungjunga mita reprang, iba sülen ang tayimtsüji tanaben apusoa liasü," ta metedaktsü.

IndiGo indang Delhi-Istanbul (6E 11) aser Mumbai-Istanbul (6E 17) tayimtsütema amokmerena liasü.

IndiGo-i sangdong ka ajanga, "Passenger tem kümzüktsüji onok atema tongtibangtiba mapa lir. Onoki tim ketdangser den amalitepa inyakdar aser inyakyim nung ajemdaker kanga kümndanga nüngdakba ajak inyaker," ta metedaktsü.

"Jodhpur nungi Delhi tashi senzüba 6E 184 tayimtsü security tekümdangtsü osang ka ngua liasü. Tayimtsüji Delhi nung anenogo aser passenger tem tayimtsü nungi aluogo. Inyakyim nung ajemdaker onoki security agencies den amalitepa inyaker," ta IndiGo-i metedaktsü.

Taoba Amongnü nungi tenzükka tang tashi nung mejangjaba nisungtemi India nunger tayimtsü 40 dak tema amokmerenogo.



TIR YIMYIM

YIMOBILEM (EDITORIAL)

DIMAPUR AMUNGNÜ, OCTOBER (MONGPUTENI) 20, 2024

Temulung süa aliba

Alima nung pelapela temulung süa alitsubaji nisung ajak atema kanga tongtibang lir. Aji oda, alima nung temulung süa pelapela malirtemi alimai arua malang aser tasoa meshizük ta kanga nemjema jembir. Aji shitak lir, kechiyong alima nung kangshia aser jashiseta alitsü atema asenok moyok saka Tsüngrem tenüng sanga Pai moatsuba agi tenük sünger asenok pelatepa alitsü asoshi iba limai yok. Ajisüaka, iba lima nung asenok temulung mesüi alitsüa asenoki bilemer, nükshir aser inyaker. Anogo shia oset tasen tasen adoker aser itemji asenoki alia agitet nungbo iba lagi asenok temulung süa alitsü amato bilemer. Asenoki aiben tangar akaba den asenok rongsen aser libaliro jenjang medemdanger aser kodanga temulung masür. Iba lagi asenok pelaa malir. Aji oda, asenoki asenok akaba rongsen aser asenok taküm libaliro jenjang nungi tepela angutsü meranger. Ajisüaka, asenoki metetsüa kaji, asenoki asen akaba rongsen aser asenok aliba libaliro jenjang nungi anguba tepelajibo teti atema masü. Ashiko, kenubo rongsen ajakji samatsüa akok mesüra rongsen jagiang lendong timtem bener arutsütsüa akok. Aji oda, asenoki chia ajemba chiyongtsü, asenok agiba sübosülemtsü aser asenok moyong osetsüsettem nungi anguba tepelajibo manger sangwa nung samatsüa tepela lir. Ajisüaka, koba tia nung lidir liaka, teti dang temulung süa alitsü aser kodanga mesamatsüa tepelajibo Yisu Khrista den tesendaktep akangakanga aliba ajanga dang angutsü. Ibayongji, tenyar Paul-i Filipi 4:11 nung ashir, "ni makamait indang jembir masü, kechiyong kechi tia nungsa ni lidir, iba nungji ni temulung süa alitsü ni angazükogo." Paul ya yimten nung tashi tulu akaba nisung ka liasü. Alima nung pa sunütsüa jangratema aliba nisungji pa ka liasü. Ajisüaka, item alima tashi, jangratem aser tepela ajakji toktsür pai Yisu Khrista nungi anguba tepela agizükba agiang temulung süa liasü. Paul-i Yisu Khristaji pa taküm nung kibur ta agizükba sülenbo pa tepuokdak aliba mapang aser teloki pa long agi onseta südaktsütsüa aliba tensa tia ajak nung pa temulung süa dang liasü. Paisa Filipi 4: 12 nung ashir, "kechi koda ajemzüka alitsü ajia ni metet aser kechi koda jenti kaa alitsü ajia ni metet. Kechisarina nung aser ajak nung anunga alitsü aser ya-a alitsü, jenti kaa alitsü aser anunga alitsü, iba mim oji ni angazükogo." Atangji, Paul taküm ya asenok den medemdangtsü makok. Pa kanga merena aliba nisung ka, anungji pai alima rongsen agia temulung süa linüra litetba jenjang ka nung liasü. Ajisüaka, pai item dakji jangratemtsü mangu. Aji oda, Yisu Khrista akaba ajanga dang pai tashi itdaktsür ta pai angatet. Asenoki aiben asenok akaba nung temulung masür, iba lagi tangar akaba dak tenük meremer. Aji oda, kodang asenoki asen nüngdak ajak Tsüngremi agütsür ta mangatetter aser mamanger, iba dak nung lagi temulung masüba tenzüker. Asenok pelaa linüra Tsüngremi asenok nem kechi moatsü, idakji temulung asütsüla. Pei akaba nung temulung süa aliba mulungjang nungi tenükmerem shisatsü madoktsü aser asen mulungjang nungi tenükmerem madokra, asenok teti pelaa alitsü. Tenyar Pauli jentia kaa alidang aser yaa alidang, tensa tia ajak nung Tsüngrem dak temulung süa alitsü angatetba miim oji asenokia angatettsü merangdi. Alima rongsen aser jenjang dak asenok temulung süa alitsü merangyonga makoktsü, kechiyong nisunger taginübaj tanen maka aser nisunger tenükshibaji asadangtsü makok. Item nung jagiang nisungtem rongnung rara aser tetsükchitep adoker. Aji oda, asenoki alima tepela nung masü saka Tsüngrem nungi anguba tepela aser temoatsü nung temulung süa litetra, alima nung tasoshia alitsüba temoatsüji aji asütsü. Ibaji shisa akariang ajangzüketter.

OLEMSABANG

MEZÜNG KHRISTA AKIZÜKER TAMANG ASER MAPA MEZÜNG KHEISTA AKIZÜKER TAMANG ASER MAPA TANÜ KHRISTAN TAMANG ASER MAPA

~ Süpongungsang Longkümer,
Darogapathar Dimapur

Mezüng khrista akizükertemji tamanger shinga maliba mapang par tangatetbaji süang kümang ta tasü eita amangtetbaji Tsüngrem tanülai jungjunga kongshiba ajanga, saka kar kibong nungpo kinungtsü bei chir ajak anizüker oa adok mesüra kinungboi yutsür ao, aser tamangertemji sarasatem tang jara tapok nungisa atalatsü saka osang tajungji timtem jendi arema yimtsüng ka nung tang masü temeket yimtsüng ajak nung Tsüngrem tashe ain nung ayimsüngä züina prokshi.

Yimtsüng shia nung mezüng khrista osang tajung akizüker tamang aser arogo jublee otsü züngdangra tamgnger shia temeshi tanülai balaka tesüngmangtsü amshia tenzükba angatetter.

Parnoki atenba ken Ozü tenük agi yisu tejak mangu No.337, Meranga penshi meranga penshi parnoki sarasatema Oh anüng Tsüngrem onoki nü dak amanger, onok temulung lapokjang aser tenük lapokjang; Amen melena HHM ta amanga aru dang yimtsüng kar nungpo timtem tulu ajuruaka parnok tamang masephsi arema nüpu yima nokdak, yimtsüng kar nungpo tamangertemji Tsüngrem ou angazükñur saka tesayur maliba ngua aria-bilema ABAM mongtang mapang mongtang daki oa nenok bangranger telok ozü yimtsüng nung Tsüngrem ou tesayur mali kanga rongjena angur anungji tesayur ka bushia yokang ta sangoktsüba angashia mongtang sangeri pelaseta bushir yokba arogo jublee otsü nung angur. Yamaji arogo shia jublee otsütem azüngdang temulung shiranga, saka pelaseta azünger. Kechiyong parnok tamangji kanga tulu liasü. Kongsa khrista tenüng metetshi, idakji osangtajung sayusüngitsü kü tejangraba liasü. aji oda tangari azüngba manung ni meyangluloktsü, sakasa ya zülua aliba ama: "Shirnok dang pa indang mesangoktsü parnoki angutsü, aser shirnoki mangashe parnoki angatettsü Rom 15: 20,21. Yamaji taa mekae arogo kati ka yaritepba arogotem tenzükyonga aru. Tang Mary-I item anügo nung, tenem linük Yihuda yimti kati aramesua ao; aser Zakariar kidangi la ai aser Elizabeth dang salem ou ashi. Aser ya adok, Elizabethi Mary salem ou angashi dang, la nu menden nung tanurji jokden, aser temeshi tanüla agi sünga arogo kati ka semtangtepba Ao arogotem ain. Ajitang masü tenzüker pushitepdang-a arogotem nung osang agütsütepba nüpu pushitep, ngur külen takinüba arogo lagi chikhu saa pener tenzüksü nangzükba arogo lagi oa salemtepba sentep tajung akia aru, aser mensem mapang sayupentsü agütsütepber tenzükerji anirsa pila. Aji tang masü tekümna tenzüker arogo tang lagi nür nüpu agi onok temulung kanga poa jangratema tenzükdake ta salem pentsür tenzüker tsürapor arogoji semtanger, yamaji arogo karipo penshia alitsü ta yimlar. Iba ama khrista runemji lemsatepber. Kodang arogotem yamaji yariteptir Marylai Elizabeth semdangtang babtitsüba Yohani tetsü pok nungi jokdena salem akizükba amaji khristar arogoji tarak mekete renloka indaktsür.

Tanü arogotem inyakyim ya kanga axi (Züpazülemer) school nung tanurtem tekolok renlokdkatsütsü sayisapongtsü aika pennokba ama, saka tongtipangji Tsüngrem tanüla agi sünga liang teli Tsüngremji kü tiyanglur aser kibur ta angatettaogo ta sürapang arogo mapa aji tatem, tetezü nüji kümdaktsütsüasoshi, aji- surpo bei-i akokba tanüla mapa inyaktsü Tsüngremi akanger. Saka she taküm mesütsü mapa kar anunga lir aji kibong aser taküm mesütsü atema bei-i jangraba mapa angazüktsü asoshi sorkar pushitsüla, saka arogoipo nisung shiai jangraba kenüyongi ajak mesayutettsü aser aji arogo mapa masü, kechaser nisung ajak kati jangraba ama jangra-a mali. Anungji arogoi kechi inyaktsü tim aji inyaktsüla ta angateter. Arogo kati arogo ka semtangba ya asentensi mapa mesüka lir. Iba nungi arogo inyakyim nunga lemsatepber, tongtipangsa tenzükertem teyaritep tulu lir saka tanü asüng arogo kati arogo ka semtangba mali .Yisui nisung bor kümdaktsütsü asoshi ango bor pushi, ibai tetezü tulu lir. Kechaser ango zütsük yagi ango aika penür aruaka tulu-a tila-a masür anungji pai ango-bortem ibala tetezü nung jatenba angur saka nisung-botsü atema pai sang asurtem, amshirtem mepushi kechaser sang lagi tekong nung leneter aser südaktsür, yamaji ashioktsüsang Yihuda-i sang asuba nung Yisu-a ashe aser kangki nung südaktsü, yamaji Yihuda-a tekong nung alesesta asü. Arogotemi tenzüker pushiba mapa arogo dak apetba ama pushitsüla kechaser tanü arogotemi arogo pushia maor saka asüngtangtepber jungra Pa/La otang anioker, aser küm süidang nüri agütsüba ango-bor tu jangratema amshidarko ta mesangoktsüe axisa (Rabayimi) yutsür. Sodi akitangbo kechi südirsaka arogo-a adentsü yimtsüri yimer-a adentsü saka aji agi mapensar, tepela mesayur ama tangatetba tatsü agi lemsatepber.

(Tekülem o Tsüngrem pelatsüsa jembidak nüpur tamang yangji lir)

Iba Olemsabang nung lemsaba ken-o aser shisatsü ya iba ocet züleri
bilemba ken-o ama tazüngeri angateta agitsü mepishir

Khristantemi kilometer 130 tarensena nokdaker longkak ait



Chhattisgarh kubok Jashpur district nung Khristantemi tarensena nokdaker yimtenren lenir ka anema longkak aitdang tangokba noksa nung angur.

Ranchi, October 19 metedaktsü.

(Agencies): Chhattisgarh nung MLA kati Yisu Khrista indang aser Khristan yimsü dangi meyipba indang tashishitsü otem jembiba sülen ketdangsertemi la anema kecha meinyakba asoshi tejashi nung Chhattisgarh nung Khristantemi kilometer 130 tashi tarensena nokdaker longkak ait, ta International Christian Concern (ICC)-i metedaktsü.

MLA, Raimunia Bhagat-i jembiba oji social media nung prokshiba sülen Khristantemi la anema police station balala nung ken o benoka liasü.

Khristantemi police dang, Bhagat-i jembiba oji Hindu nungertem aser Khristantem tsüngda rara adokdakstsü nükjidong nung jembiba lir, ta

Jashpur district nung longkak aitba nung shilem agir Khristantemi Bhagat aputsüla, ta takhangba agütsü. Longkak aitba sentongji Christian Adivasi Mahasabha-i ayongzüka liasü.

Christian Adivasi Mahasabha nung Tir, Anil Kumar Kispotta-i, "Bhagat-i jembiba o ajanga Khristantem aika kanga jashir. Ajisüaka police-i la anema kecha meinyaker. Tangbo onoki tesünep nung dang longkak aiter, ajisüaka la anema kecha meinyakra onoki gari lenmangtem mokdanger longkak aittsü," ta metedaktsü.

Chhattisgarh Christian Forum nung Tir aser Khristan yimtenren party Sarv Adi Dal tentetsang, Arun Pannalal-i, metedaktsü.

Pannalal-isa, par party-i iba tatalokba anema state Angh dangi shidi ka zuluogo, ta ashi.

Pannalal-i, tribal society-i tribal Sarna ya yimsü masüba society ka lir aser Bhagat-i la Hindu tribal lir ta shiogo.

Ajisüaka tribal organizations aikatia, lisopurtembo Hindu nunger masü, ta sangdongogo.

Supreme Court-ia, tribal nisungtem ya yimsü den kanga sendaktepa aliba society bo masü ta shiogo, anungji Bhagat-i jembiba oji linük temzung alema lir aser Supreme Court tetuyuba anema lir, ta Pannalal-i metedaktsü.

Legislative assembly nungi Bhagat anentsütsüla, kechiyong lai India temzung kümzüktsü atema tenangzükba agia aliba anema lai inyakogo, ta ashi.

ANOGO ABEN TSÜNGREM DEN

MESHITETA ALIBA NUNG TEMOATSÜ

Idangji Yihusuai nüburtem dang ashi, "Nenok meshiteta liang kechiaser asüng Kibubai nenok rongnung tesüngmangtsü mapa inyaktsü. Yihusua 3:5

Aseni amangba Tsüngremji temeshi aser temerük, anungji Pai temerük taküm, temerük mapa akanger. Aki alemli nungi Pai temenen aser temeshi mapatem jungkai adokdakja bendanga aru.

Yisu alimai aruba ya tebu Tsüngrem inyakyim sayutsü asoshi aru. Pa tasodang temerük kibong ka nungi aso. Pai memerükba aser temeshi indang sayutsüngi, Pa Yirusalemi aitang shinga memendangba Gado ka nung amen, Pai yirusalem tenla kidang memeruki aliba merüktetdaktsü. Pa taküm alidang tasü ita meimchir tai temenen mapatem ajak aija merükteta meshitetsü.

Tanü meimchir taküm, kibong sentong aser mapatem reprangdangra memerük aser memeshi agi sünga lir. Asen taküm yimya aser mapa agi Tsüngrem mepeladakstsüba aser aika metsüdakdakstsüba agi temoatsü taküm ta kuli asütsü tarendaktsü agi sünga kumogo.

Arung, mapang ajak nung yisui sayuba ama bilemba jembiba aser inyakba mapatem merüka aser meshiteta alitsü nükjidong südi süra Tsüngremi na aser ni ajanga tesüngmangtsü mapa aika inyaktsü.

"Meshiteta bendanga agüja inyakba nung Tsüngrem sentong ataloker."

Pakistan nung TikTok video ka atema Khristan adianu ana apu



October 19, 2024: Pakistan tai tongloksü. August 26, 2024 nü yimdat sentong ka nung adianu- Rahal Masih aser Tabish Masih nati tangar Khristantem den küleme benjung amongdang yimsü dak sendakba ken aser tekülem kentem tena liasü.

Pakistan nung tsüngrem mezüngmeshiba ozüng kubok tena nem tai tongloksü. Taoba mapang school küleme azunger, Ghulam Mustafa-i tena nem

Quran temeshi kaket nungi tapak kar shisar apar, ta ayimdena liasü.

Tahreek Labaik Pakistan (TLP) nung züngsem Mustafa-i, "Item nisungtem ya asenok rongnung küleme alitsü metemsü," ta ashi.

Tensa tamajungba kuma lokti kati adianu ana dak azük, saka tenati jena oteta liasü. Lokti ji tejashi nung par kima adenshi aser Khristantem anema yimyim ayima liasü.

Lokti jagi tena dak kuna nem, künati azüksü tebilemba liasü saka police iba tesemji aruba ajanga tensa azüoktet aser adianu ana jagi police künati Yisu dang künati ochi nungi masetshitsü atema kuna nem tashi agüjang ta sarasadem.

T s ü n g r e m mezüngmeshiba ozüng kubok adianu anaji apu.

Mustafa-i GCR dang, "Iba linük ya Islam atema lir.

Yangi alirtem ajaki Islam yimsü agizüksüla. Tamalen ni Rahal aser Tabish naprongla Islam yimsü dangi meyipdakstsütsü meranga liasü, saka tenati Islam yimsü magizük," ta metedaktsü.

Tang adianu anaji judicial ket nung lir.

GCR den jembidang Tabish-i, "Mezüngbuba anogo ana tsüngda police-i

aibelenogo ta kuna nem nangzükda ktsütsü meranga liasü, ajisüaka künati Yisu dang künati ochi nungi masetshitsü atema kuna nem tashi agüjang ta sarasadem.

Ajioda Pai kuna nem tashi agütsü," ta ashi.

Tena atema ken o jembitsür, Abid Gujral-i, September ita nung iba ken o angadangba mapang nung court-i tena nem bail agütsütsü, ta imlaa liasü saka tang tashi tena jail nung lir, ta ashi.

Muslim nungertemi amakstsü akok, ta tetsübu nung Masih'er kibong züngsemtem aser iba tesem nung aliba Khristantem ajaki pei ki toktsür jenogo.

Hindu yimsü alia amangertemi Khristantem anema technology amshir

October 19, 2024: nung Khristantem dang Khristan yimsü tokstsütsü ajungshir, ta Rest of World indang report ajanga metedaktsü.

Bastar region kubok internet amshirtemji jila nung alirtem dang nungibo yimtsüngtem nung alirtem teimba lir aser VHP-i züngsemtem nem Vivo mesüra Samsung ama smartphones agütsür. Parnok rongnung technology kanga bulua amshiba ajanga VHP züngsemtem tsüngda melamela tongtepratepteter

aser tesem balala nung amalitepa inyakteter.

2014 küm Kashyap kibongi Khristan yimsü agizüksüliasü, saka iba kibong nung Radhibai dak cancer tashidak putet. Taküm May ita nung la asüba mapang nung VHP nungi lokti kati WhatsApp ajanga osang lemsatepba sülen lar kidang adenshi liasü.

Jaldhar Kashyap-i, "Onok nem mapang züngzüktsü. Yimdat asüpila sentong aginüra Khristan yimsü tokjang ta onok dang ashi.

Lokti jagi yimdat leper tsütsüleni aoba lenmag nokdang aser kangshia onok Hindu yimsü dangi meyipdakstsüba sülen ang asüpila sentong agitsü temelaba agütsü," ta metedaktsü.

Bastar region nung VHP züngsemtem meyirjang aika lir aser parnoki WhatsApp telok balala lemsar yim 50 ayimjema inyaker. WhatsApp group shia nungji director kaka lir aser parnoki tetuyuba balala agütsür.

VHP züngsemtemi

Khristantem inyaksangshi ajak mita repranger aser Khristantem asüpila sentongtem nung timtem agütsür.

India nung Hindu nungertemi tasümg rongdoker. Kodang Khristan kar süadokdir VHP züngsemtem WhatsApp ajanga osang proka ayongdener aser Khristantem asüpila sentong metenzükang iba tesemji tonga oor tasümg aremtsü aliba nokdanger aser Hindu yimsü dangi meyipdakstsü meranger.

AO OSHI ANGAZÜKDÄK:
TANÜ ANGAZÜKTSÜBA OJANG


Tir Yimyim

Taoba

(adv) ka dang nungi ka tajungba ta ashiba (more worthy)
 * Ni meimba dang nungi taoba Tsüngremi ni meim.

Taochi

(n) aria bilem, temeim sayu (grace / mercy)
 * Tsüngrem taochi agi asenok kümzük

OLONG PAITEP # 6956

1	2		3	4		5
			6	7		
8						
				9		
			10			
11					12	
			13		14	
15						
16				17		

TIPLÉN

1. Nüji masü	- (4)	1. Jila tulu	- (5)
3. Techinütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

LANGTSÜNGLEN

1. Jila tulu	- (5)
2. Sarasademdang tembang	- (4)
4. Tarutsü indang ashirtem	- (6)
5. Alia	- (5)
6. Mojing	- (5)
9. Tai inyakba metet	- (5)
10. Medemer chijiba	- (6)
11. Tatokba / Amadok	- (5)
12. Anüngdang masü	- (5)
14. Jabaso masü	- (4)

OLONG PAITEP # 6955 TELANGZÜBA**TIPLÉN :**

2. Anatsü, 6. Nüji, 7. Aputak,
 9. Lung, 10. Lenir, 11. Aben,
 14. Langzü, 16. Aket, 17. Süsang.

LANGTSÜNGLEN :

1. Pokpo, 2. Ajet, 3. Atak, 4. Senyur,
 5. Mit, 8. Asen, 9. Liwa, 10. Leptsü,
 12. Azüok, 13. Nao, 14. Lasa,
 15. Menungra.

NAI-A YA METETTER MA

India nung 'MumbaiHacks' ta ser Gen AI Hackathon tulutiba ayongzüka agitsü. Iba sentong ya Entrepreneurs Association of Mumbai (TEAM) aser Made in Mumbai-i NVIDIA, Meta, Quantiphi, aser ATLAS SkillTech University den yaritepa October 25 & 26, 2024 anogotem ayongzüka agitsü.

Kuki telungpurtemi police station amak

Imphal, October 19, 2024 (Agencies): Manipur kubok Jiribam district nung Kuki telungpurtem ta temulung melemi bilemeremi Bodobekra Police Station amak.

Telungpurtemisa anameta aliba Meitei yimtsüngtem nung ki pezü rongdoktsü.

October 19 anepdang 3:30 ako meta telungpurtemi Jakuradhor nung Bodobekra Police Station amak.

Idangji Central Reserve Police Force (CRPF) aser Manipur Police-ia meyiper injang khaloktsü aser telungpurtem jena ao.

Iba tatalokba sülen ketdangsürtemi temeket nung search operations tenzükogo aser telungpurtem aputsü atema bushisüngdang südar.

Kasa mapang nung telungpurtemi Juladhor Part 2 aser Durgapur yimtsüngtem amak. Yimtsüng shia nung parnoki Meitei nunger ki anana rongdoktsü, ta police ketdangsür kati ashi.

Iba tesemi sepa talila yok saka telungpurtemji Manipur kubok Pherawl district leni jena ao.

Myanmar nungi drug shibelenba mapa tuluba inyaker

Aizawl, October 19, 2024

(Agencies): Myanmar nung mitkartem sorkar atsüngdokba sülen Northeast region nung aser talisa Mizoram nung drug shibelenba mapa kanga bulua inyaker.

Mizoram nung ketdangsürtemi drug khuret tuluba akümba atema tebilemtsü abena aser iba mapa azüoktsü meteddkatsüogo.

Mizoram nung security forces-i Myanmar nungi drug aika shibelenba aser talisa heroin

aser methamphetamine tablets tsüngda parnoki Myanmarese nunger asem dena mozü shibelenner nisung 8 puogo.

Myanmar nungi heroin aser methamphetamine tablets (party tablets/Yaba) bener arur aser iba ya February 2021 nung mitkartem sorkar atsüngdokba sülen kanga bulua inyaker ta Aizawl nung police ketdangsürtemi ashi.

Taoba hopta ka tsüngda tatalokba trok nung Assam Rifles sepaitemi heroin gram 350, methamphetamine tablets seret 22.309, ganja (Marijuana) seret 7.6 aser ozüngi memelaba Indian currencies 90 lakhs puogo.

Item tatalokba nung Mizoram Police aser Customs ketdangsürtemi Assam Rifles meina liasü.

Guwahati nung gari auyar 4 apu; police 9 yiru

Guwahati, October 19, 2024

(Agencies): Assam kubok Guwahati nung Hokolbar aonung gari auyar nisung pezü puogo.

Gari auyartem arrshia aodang Hatigaon Police Station nungi police 9 tashi yirua liasü.

Nisung pezü ya cross-border car traffickers ta temulung malemer aser Guwahati nung Khanka Idgah road anasa iba ya atalok.

Auerter arrshiba mapang Nabur Ali, Krishna Sarathi Gogoi, Akther Ali, Rausan Ali, Sushi

Kalita, Dipankor Das, Kuldip Mazumder, Dhurbajyoti Sarmah aser Nayak Rangkhal nunger yirua liasü.

Gari auyartem ya nisung pungu liasü aser parnoki Guwahati nungi auyaba gari kar bener aotsü atema aruba liasü ta police-i ashi.

Police-i iba dak sendakba osang tejangja ano memetetdaktsü lir saka parnoki auyaba garitemji Bangladesh-i bener ao tabo shiogo.

Khanka area nung parnoki



October 19, 2024 nü Meghalaya Chief Minister Conrad K Sangma-i Synod College Annexe nung Vocational Training Centre lapoktsüogo. Paisa Diamond Jubilee Celebrations lapoktsü aser college ketdangsürtem dang quality education agütsüba atema tenüngsang agütsü. Meghalaya CM Conrad-i Vocational Training Centre lapoktsüdang mushroom cultivation amala training agitsü aser sorkar indang schemes balala nungi tajangzük agitsü merangang.

GOVERNMENT OF NAGALAND
 OFFICE OF THE SENIOR TREASURY OFFICER
 KOHIMA SOUTH TREASURY

NO: KTS/PEN/106/2005-06/

Dated Kma the

PRESS RELEASE

This is to inform all Pensioners both Life and Family drawing pension from Kohima South Treasury, that the Annual Physical Verification for 2024-2025 will be held from 11 to 14" November and 18 to 22th November 2024 at the South Treasury Office during office hours. All the Pensioners are to appear physically along with PPO Book, Renewed NPA ID card and Life Certificate, which will be issued from the Treasury Office from 21" October 2024 onwards. **Failing which further payment will be stopped.**

(ZUBENTHUNG MURRY)
Sr. Treasury Officer
Kohima South Treasury

Drone kati Ato Kilonser Netanyahu'er ki amak

Tel Aviv, Mongputeni/ October 19 (Agencies): Honibarnü Israel north len Ato Kilonser Benjamin Netanyahu'er holiday ki drone ka amshia makogo ta Al Jazeera-i sangdong ka ajanga metedaktsü. Iba sülen Tel Aviv yimti densema Israel kübok tesem balala nung air raid sirens ola agüja liasü.

Netanyahu indang otongdari ashiba agi, Lebanon nungi yokba drone ka agi Honibarnü Caesarea jila nung Netanyahu'er ki dak konghia liasü, ajisüaka pa iba kidang maliasü aser lendong nung nisung asüba osang kecha mali.

Ano tanga drone ana Israeli military-i khadanga liasü, ta Israeli military-i ashiba den Lebanon nungi Israel north leni rocket 100 dak tema yok aser nisung 13 yiruja liasü, ta metedaktsü.

Iran den sendaktepba aliba Hezbollah telok aser Israel na taoba küm October ita nungi arrtsü adena khatipa arudar.

Al Jazeera osangbener Nour Odeh-i Amman, Jordan nungi ashiba agi, Netanyahu'er ki amakba ya pa tepsettsü merangba ama Israel nunger kettangsürtemi züngshir.

"Netanyahu'er ki amakba ya pa tepsettsü merangba ka asü masü aji ashitsü makoktsü, ajisüaka Israeli security establishment-i iba tatalokba ya pa tepsettsü merangba ama agir," ta lai ashi.

"Drone ya Lebanon arrtsü nungi km 70 tashi meputeti oa target dak konghiba, aser iba mapang sirens ka danga ola madokba ajanga Israel aser Israeli security establishment kanga tebilemtsü akar," ta lai ashi.

Lai ashiba agi, Netanyahu'er ki drone amshia amakba dak meranglokdaktsütsü atema Lebanon nungi rocket aika yoka liasü. Galilee aser Haifa yimi

Khamenei



Tehran, Mongputeni/ October 19 (Agencies): Iran lenir Ayatollah Ali Khamenei-i Honibarnü ashiba agi, Hamas lenir Yahya Sinwar asüba ajanga "Axis of Resistance" menokdangtsü aser Hamas teloka mesami liyonga aotsü.

"Pa asüba ya Axis of Resistance atema takoksa tulu, saka iba lokti tentet ya tongtibang lenirtem asüba ajanga tejakdangi

aotsü nungi menokdangi arudar," ta Khamenei-i ashi. "Hamas taküm lir aser maneni liyonga aotsü," ta pai ashi.

Sinwar, shiba lenisüba nung 2023 küm October 7 nü Israel maka liasü, pa Bodhbarnü Israel nunger sepaitem den khatepa mapang khaseta liasü aser pa asüba osang ya Brehostibarnü sangdongogo.

"Pa ya resistance indang

densema Israel north len sirens tesem nungi ashiba agi, northern Gaza nung tenük kuli agütsürtemi pa dang ashiba agi, Indonesian Hospital indang tasembuba aser pezübuba floor aser mozuki kima nung bomb pokloktsü aser iba mapang nisung aika siüogo.

Moziuki telung nung shiranger 40 sabanga lir aser Israel nunger tank temi mozuki meketbanger lir, ta pai ashi.

Kasa mapang nung Jabalia tesem sabanger hopta asembuba ajungba mapang moziük asem kong yirur alirtem anepaludar aser Palestine nunger aika jenoka lir, item moziükitem maneni makdar aser Israel nunger sepaitemi tesüa ki aika amakba sülen nisung 33 dak tema tepsetogo.

Israel nunger sepaitemi Honibar anepdang Jabalia nung al-Awda moziük dak bomb pokloktsü aser parnokisa Kamal Adwan aser Beit Lahiya nung Indonesia nunger indang moziük toba ghonda ishika tsüngda makogo, ta Al Jazeera osangbener kati metedaktsü.

Kamal Adwan Hospital nung laboratory kikümtong nung bomb pokloktsüba sülen nisung ka asü aser nisung ishika yirua liasü, ta Gaza indang Health Ministry-i ashi.

Maneni Israel nunger sepaitemi central Gaza kübok Maghazi refugee camp amakba sülen nisung 11 tepetogo ta Palestine nunger indang official news agency WAFA-i Honibarnü metedaktsüba den ki raksar aliba nung ano nisung aika sabanga lir, ta shisem. Taoba ghonda 24 tsüngda Israel-i Gaza kübok tesem balala amakba mapang nisung 67 tepetogo, ta kettangsürtemi metedaktsü.

Al Jazeera osangbener Tarek Abu Azzoum-i central Gaza kübok Deir el-Balah tongtibang lir.

Yahya asüba ajanga 'Axis of Resistance' menokdangtsü: Khamenei

tongtibang nisung ka liasü. Pai temulungtetba tulu nung parnok tsükchirtem anema nokdakogo. Pai shisatsü amshia aser tasü ita tsükchirtem October 7 nü maka takoksa tulu bener arutsü, koba iba tesem puti otsü nung mangaoka lir. Iba sülen pa rara nung asürtem den kanga tushia aser nema danga kotai ogo," ta Khamenei-i ashi.

"Axis of Resistance" ya Iran-i teyari agüja tentetba telok ka lir, kong Hamas, Lebanon nung Hezbollah telok, Yemen nung Houthi movement aser Iraq aser Syria na nung Shi'ite telok balala densema lir. Iba telok yagi parnok ya Middle East nung Israel aser US na anema nokdakertem ama züngshir.

"Teti ama onok maneni sepaitem den nokdaktsü aser tsüngremi teyari agütsütsü aser taichi sayutsü," ta Khamenei-i ashi.

MENUNGRA BILEMTETER

Asür Talisenla (Chuchuyimlang)



20.10.1999
20.10.2024

Temiem oya nai onok toktsür orr küm 25 jungaka nü temiem onoki amatsü makoker.

Nü mapa tajung aser lenisüba onok mulung nung teti dang alir.

-Temiem Kinungertem.

SANDONGER

Mr. Imtingangnen ajangja Yimjenkimong nunger nem timtem agütsüba ken O dak sendakba jembitsü 18th Oct 24 Ajuzen Züngar ajanga Yimkong Sungsama ayunga lemtetba

1. Yimjenkimong yim kümer Oboula, Otsüla mapang nungi putu aben melentepa yimsü sua arudang, **Yimden** yimli küpok tashi anga meliteter aibelener yari merenshia azüoka aru. Anosa tashi mangai timtem agütsüra **Sungsama** nung yimkongi jembir ki tangtsütsü, aser **Yimjenkimong Yimden yimli sobaliba (Customary)** nung aliba ama yimdak nungi aridoktsü, anosa timtem agütsüra par kimong lumong, par akaba ajak **yimkong** meyung kümadoktsü aser par chirnur aser Semchisemnur kodanga yimdaki marudaktsütsü ta yimsü sua aru.

2. Yamaji Mr. Imtingangnen ya **Yimjenkimong Yimden** Yimli nung maliba mapa inyakba dang masü, **Yimkong sungsama** lemtet anema tashi mangai aiben yimer nem timtem agüja aru nung 5 Oct 2023 anogo nung **yimkong sungsama** ajanga Mr. Imtingangnen aser par kibong kum semer (30 years) atema **Yimdk** nungi aridoktsü lemtetba ama, 12 Oct 23 anogo local paper nong sandong agütsüogo. Aser iba anogo nungi Mr. Intingangnerji Yimjenkimong nunger senso rongnung maten.

Anungji iba ken o dak sendakba nung kecha court nungia pa temeten bener arua yim aser yimer lushi nung inyaksangshi asütsü memelar.

Yamaji Yimjenkimong Yimden Yimli sobaliba (customary) mera keda wazuka ayutsü mech iymidak nungi aridoker aliba Yimer senso nung matener, nisung katı appeal asüba kecha court nunga Yimjenkimong nunger Sensosanger shinga mesenzütsü aser maotsü. Iba lentet nung tashi mangar Sungsama ajanga temerenshi tulu alitsütsü ta, tano 18 oct 24 nenshia renemba sangdonger.

(J. Pongen)
Seasonal Chairman

Sept 18.10.24.
(T. yapang Tsüdir)
Seasonal Secretary

Yimpurter (Village elders)/-

Tenung	Kidong
Marliba	Tsüdir
Imtilemba	Ozükum
Imdangitba	Noksen
Imkongzulu	Longchar
Sentishilu	Lemtor
Bendangozung	Sempo
S. Jongpong	Pongen
Lanumeren	Walling

OFFICE OF THE DIPHUPAR AO SENSO TELONGJEM

Chumoukedima, Nagaland

AITSÜR

NSCN-K(Niki) teloki onok telongjem nung züngsem tajung ana pua bener oagi tena melen sen meshiba mapa tamajung anema Diphupar Ao Senso Telongjemi sashia aitsür. Iba ama mapa yagi linük tenzükertem pei ajangzüksü atema parnok sünütsü südakja Naga nunger rongsenren nung peisasa menokdaktettsüsa timtem agütsüba kuli jungkai adoka sayur. Iba ama timtem agütsüba mapa tamajung aser loktiliba sünepa melitettsüsa nisung ka temeten raksatsüba mapatem anema nisung ajak longjemer ola adoktsü asoshi mepishir.

Onoki CFMG/CFSB mendenbuba aser state nung ozüng mapa küma inyakertem dang parnoki nangzükba ama memenui ozüng anema inyakertemji pua bener arua ochi obendang agütsütsü mepishir.

Sd/-
IMTIIMSUNG
President,DAST.

Sd/-
REJOSANEN
General Secretary, DAST



MDFA Trophy 2024 pezünübuba Sports Society Soyim aser Zonipang SC tsüngda asayaba mapang tangokba noksa.

Mokokchung, October/ Mongputeni 19(TYO): MDFA Trophy pezünübuba asaya 3 tashi asaya-a liasü.

Mezüngbuba asaya Amolmolu Sporting Club(ASC) aser Konyak Students' Union Mokokchung(K.S.U.M) tsüngda asayaba nung asaya tenzüker minute 13 buba nung Amokmolu telok nungi J.no-7 Tarepnungsang-i goal-1 yok, iba sülen asaya-a aodang K.S.U.M telok nungi minute 30 buba nung J.no-18 Naoman H.Konyak-I goal-1 yoka telok ana kasasa akum, iba sülen tia maka Amokmolu telok nungi Namang J.no-19 ajanga pei tsütsü goal(own goal)-1 minute 45+2 nung idakstsü aser K.S.U.M telok takoklen sur anis ngzükba mapang agi.

Anisüngzükba mapang agir

kelen tanaben ground-I aita asayadang minute 64 buba nung Amokmolu telok nungi J.no-10

Lipoksüne-I goal ka yukteta tanaben ano telok ana kasasa akum aser iba asaya kasasa nung tembang saka iba asaya nung Amokmolu telok nungi J.no-7 minute 8 buba nung yellow card achi.

Tanabuba asaya Team Gilgal aser Moanungsang Memorial Sporting Club(M.M.S.C) tsüngda asayadang minute 42 buba nung Team Gilgal telok nungi J.no-12 Ato Chopi-i goal-1 yok aser parnok takoklen sur anisüngzükba mapang agi.

Tanaben ground-I aita asayaba mapang nung minute 50 buba nung M.M.S.C telok nungi J.no-15 Nungsangtoshi-i goal-1 yoka telok ana kasasa kümber asaya kasasa nung tembang aser

iba asaya nung M.M.S.C telok nungi J.no-2 Bendangmongba yellow card achi.

Kasa anogosa tasembuba asaya S.S.S aser Zonipang SC tsüngda asaya aser iba asaya nung Zonipang S.C nungi J.no-10-i minute 41 buba, minute 47 buba aser minute 63 buba ta goal-3 yukteta (hat-trick), iba sülen ano Zonipang S.C telok nungisa minute 66 buba nung J.no-7 Aripong-i goal-1 yok aser anosa minute 80 buba nung Zonipang S.C telok nungisa J.no-8 Nungshisashi-i goal-1 yoka Zonipang S.C teloki 5-0 agi S.S.S telok ayong ayonga akok.

21 Oct Matches:
L.Y.M Vrs NU Lumami -12:00 Noon
Telongjem Vrs K.S.U.M -2:00 PM

India vs NZ: Sarfaraz-i alizüng tasenka tongtetogo



Sarfaraz Khan

Monputeni/October 19, 2024 (Agencies): Sarfaraz-i run ka danga 2024 (Agencies): India meyangluteti out asü, ajisüaka nunger lanur asayar Sarfaraz Khan-i Honibarnü Bengaluru nung New Zealand den mezüngbuba Test asayaba mapang tangari metongtetba alizüng ka tongtetogo. Pai kasa asaya nung duck ka achiba sülen run 150 dak tema yanglúa liasü.

Pai iba ya ajangzüktetba sülen pa taoba mapang India nunger asayar Madhav Apte aser Nayan Mongia na den densemogo. Madhav aser Mongia natia asaya ka nung duck achiba sülen run 150 dak tema yanglúa liasü.

Mezüngbuba innings nung

Sarfaraz-i run ka danga meyangluteti out asü, ajisüaka tanabuba innings nungbo pai ball 195 nung run 150 yanglúa liasü. Pai four 18 aser six asem züka liasü. Pa ya Test asaya nung India nunger lanur asayartem rongnung tajungtiba ka kümdar.

Mumbai nungi asayar ya India teniung nungi tang agi Test asaya pezübuba nungang asayar aser Honibarnü asaya ya run 70 yanglúa tia tenzükba sülen pai kasa anogo pa indang career nung mezüngbuba century yanglúa liasü.

India team-i mezüngbuba inning nung run 46 dang yanglúa sülen pai tanabuba innings nung kanga tongtibang

shilem agiogo. Mezüngbuba innings nung New Zealand-i run 402 yanglúa parnok run 356 agi tejakdang liasü.

1953 küm Madhav Apte-i West Indies den Port of Spain nung asayaba mapang 0 and 163* yanglúa aser Nayan Mongia-i 1996 küm Delhi nung Australia den asayaba mapang run 0 aser 152 yanglúa liasü.

Sarfaraz-i iba alizüng tongtetba ajanga tamakok nungi meyipa arur junga asayatsü asoshi aser tongtibang mapang nung pressure azükteta asayatsü atema pa dak tashi aliba sayur.

Maneni India nunger asayartem rongnung Pant-ia kanga junga asaya ajisüaka tia maka pai century meyangluteti run 99 yanglúa aliba mapang out sülen liasü.

Honibarnü nikongtsütsü tzünglu kanga sashia aruba ajanga asaya anenadok. India nunger asayartem asayar ajak out sur run 462 yanglugo aser iba asaya akoktsü atema New Zealand team-i run 107 dang nüngdaker. Tsüngsang majungba ajanga minprong mesüra NZ atema anogo ka tepeyong nung run 107 meneptsü ya kanga tasakbo masütsü aser parnoki asaya ayong ayonga akoktsü imlar.


Old Trafford nung training atema Indian nunger football asayar 3 shimogo

Mongputeni/October 19, 2024 (Agencies): Tangar ana den külemi India nunger football asayar asem Manchester kubok Old Trafford nung training agitsü atema shimogo. Grassroots football initiative 'United We Play' pezübuba akokba sülen parnok ya shimogo.

Iba asayamung nung yimti 18 nungi India nunger lanur football asayar 15,000 dak temai shilem agi aser Chandigarh nung final asaya nung Manchester United nungi taoba mapang nüngtugu asayar Gary Neville-a dena liasü.

Final nung PC Lalchhuanawma (Mizoram), Shreejal Kisku (Bhubaneswar), aser Mohd Ayan (Lucknow) nunger Nepal nungi Bhakta Bahadur Pariyar aser Bangkok nungi Chanason Chaiyatham na den shima liasü.

Item asayartem nem Old Trafford semdangtsü asoshi maongka agütsü aser iba mapang parnoki asaya rebrangsü, Manchester United



Paul Pogba

"Ni Juve nungi asayatsü aser training agitsü atema renema ataner. Ni Juve nungi asayar ka lir aser tang kü mulung nung aji dang lir," ta paisa shisem.

Tenokdangba agütsü aliba mozü amshiba atema Pogba nem küm pezü atema tenokdangba agütsü, ajisüaka October ita Court of Arbitration for Sport (CAS)-i ita 18 ajemtsüogo aser pa taruba küm March 11 nü nungi asaya tenzüktsü.

2023 küm August ita Juventus aser Udinese na asayaba sülen Pogba dak testosterone puteta liasü.

Kasa küm pa September ita khen atema suspend sütsür liasü aser iba sülen February ita Italian National Anti-Doping Tribunal-i küm pezü atema tenokdangba agütsü.

Pogba teniung nung nokdaktsüri ashiba agi, pa dak testosterone puteta ya United States nung doctor kati agütsüba food supplement nungi liasü.

BILEMDANGANG

"Ajemalua meranga inyakang, sura takok tajung angutsü."